



ASSEMBLEA DI
CORSICA



N° 2017/E1/005

**DUMANDA ORALE POSTA da Laura Maria POLI
À NOME DI U GRUPPU « CORSICA LIBERA »**

OGETTU : PULLUZIONE DI I SPAZII MARINI PER VIA DI I MICROPLASTICHI

O Sgiò Presidente,

Madama a Presidente di l'Uffiziu di l'Ambiente di a Corsica,

A pulitica ch'ellu porta u Cunsigliu Esecutivu dapoi un annu insegna chì l'eculugia hè propiu à u centru di u prugettu di a magiurità territoriale,

Ci vole à salutà cumu vi site impegnati è u travagliu chì hè statu fattu in issu duminiu, in particolare in quantu à a quistione di i ghjetti.

Ma, puru s'ellu si hè fattu un bellu travagliu nantu à a nostra isula, u nostru paese hè ancu ellu a vittima di issa pulluzione mundializata. Isula hè, ma quessa ùn lu tene luntanu da issu castigu.

A mo dumanda porta nantu à una pulluzione in particolare, quella di i spazii marini, è ch'elli facenu imicroplastichi.

Di fatti un studiu scientificu publicatu da pocu hà fattu vede chì u Mediterraniu era cuntaminata à veru da a pulluzione à u plasticu è chì u più puntu altu d'issa pulluzione hè situatu trà Capicorsu è Toscana.

Issi microplastichi di menu di 5 millimetri venenu da a framentazione di i plastichi lampati in l'oceani è i mari (sacchi, buttiglie, involuppi...), cun l'effettu meccanicu di i marosuli, di u ventu, a rena è l'azione chimica di l'UV.

Pè u più issi plastichi venenu da i ghjetti industriali ma ancu da i cumpurtamenti persunali.

Issi macroghjetti chì si spezzanu è tornanu issi microghjetti (l'atri si ne falanu in i fondi sottumarini) à 80% venenu da e terre è pè u più da e scariche à l'apertu, da ghjetti lacati in a natura è da l'avvenimenti climatichi stremi.

20% venenu da ghjetti lampati in mare da a ghjente chì si ghjovanu di battelli di piacenza, da a marina mercante o da battelli da pesca.

Issa pulluzione cagiuneghja cunsequenze drammatiche per l'ecosistema sanu sanu.

Di fatti, quessi i ghjetti ponu durà sinu à 1000 anni in l'ambiente marinu è tandu cappià ind'è l'acqua e sustanze chimiche dannifiche chì i cumponenu.

Tutte isse sustanze dannifiche, quand'elle sò cappiate ind'è l'ambiente marinu, e si surpanu i microurganisimi. In quantu à i microplastichi, quessi i si ponu ingolle direttamente a più parte di e spezie di planctoni, i pisciucci è dinù urganisimi filtratori cum'è i muscoli o l'ostrice.

Si infatta chì issi urganisimi tutti quanti sò i primi anelli di a catena alimentaria.

Hè cusì chì parechje spezie, ma dinù per cunsequenza l'omu, patenu issa pulluzione di i microplastichi per mezu di a bioaccumulazione.

In quantu à i macroghjetti, quessi anu un impattu direttu è chì si vede, in particolare nantu à l'acelli è i mammiferi chì tutti l'anni morenu da issa pulluzione.

Dunque quessa hè una pulluzione cumplessa è ch'ùn si vede, ma sopra à tuttu periculosa è dannifica assai.

Hè sicura ch'ellu ci vole à sensibilizà l'individui, ma senza scurdà si chì a pulluzione più maiò sò sempre l'industriali à fà la ed hè contru à quessi ch'ellu ci vole à piglià e sanzione.

Cumu scurdà si di l'esempiu di l'usina ALTEO in Gardanne, ella chì sò decenni ch'ella pullueghja u Mare Mediterraneu senza trimà nè inchietà si mancu à pena?

Di fatti s'è i scarti solidi di l'usina d'alumina ùn sò più lampati in u Mediterraneu dappoi un annu, ùn hè micca listessa pè i ghjetti liquidi tossichi è quessi si cuntinueghja à lampà li.

Per compie aghju da ramintà chì da u 15 di lugliu 2016 hè ufficialmente stallatu u Parcu marinu di Capicorsu è di l'Agriate.

È tandu, mancu à pensà la chì issa zona pulluata cun l'azione di l'omi ùn fussi micca trattata in nisun modu, per via chì in più di i danni nantu à l'ambiente è a salute, issa pulluzione custì imbrutta a maghjina di u parcu è di u territoriu.

Dunque, a mo dumanda hè semplice, Madama a Presidente:

Da fà fronte contr'à issa pulluzione qualesse sò e misure ch'è vo cuntate di piglià ?

À ringrazià vi.